

**REGLUGERÐ EVRÓPUÞINGSINS OG RÁÐSINS (ESB) nr. 660/2014****2015/EES/63/75****frá 15. maí 2014****um breytingu á reglugerð (EB) nr. 1013/2006 um tilflutning úrgangs (\*)**

EVROPUÞINGIÐ OG RAÐ EVROPUSAMBANDSINS HAFNA,

með hliðsjón af sáttmálanum um starfshætti Evrópusambandsins, einkum 1. mgr. 192. gr.,

með hliðsjón af tillögu framkvæmdastjórnar Evrópusambandsins,

eftir að hafa lagt drög að lagagerð fyrir þjóðþingin,

með hliðsjón af álitum efnahags- og félagsmálanefndar Evrópusambandsins <sup>(1)</sup>,

með hliðsjón af álitum svæðanefndarinnar <sup>(2)</sup>,

í samræmi við almenna lagasetningarmeðferð <sup>(3)</sup>,

og að teknu tilliti til eftirfarandi:

- 1) Í reglugerð Evrópuþingsins og ráðsins (EB) nr. 1013/2006 <sup>(4)</sup> er mælt fyrir um kröfur, í því skyni að vernda umhverfið, um tilflutning úrgangs innan Sambandsins og milli aðildarríkja og þriðju landa. Hins vegar hafa komið í ljós sundurleitni og eyður í framfylgd og skoðun af hálfu yfirvalda sem koma að eftirliti í aðildarríkjum.
- 2) Viðunandi skipulagning á skoðunum í tengslum við tilflutning úrgangs er nauðsynleg til að koma á þeirri getu sem er nauðsynleg fyrir skoðanir og til að koma í veg fyrir ólöglegan tilflutning með skilvirkum hætti. Í því skyni að tryggja reglulega og samræmda skipulagningu á slíkum skoðunum ætti því að styrkja ákvæðin um framfylgd og skoðanir sem mælt er fyrir um í 50. gr. reglugerðar (EB) nr. 1013/2006. Koma ætti á skoðunaráætlunum fyrir skoðanir sem eru framkvæmdar í samræmi við þessi ákvæði. Skoðunaráætlanir ættu að byggjast á áhættumati og í þeim ættu að vera nokkur lyklatríði, þ.e. markmið, forgangsmál, landsvæðið sem áætlanirnar ná yfir, upplýsingar um fyrirhugaðar skoðanir, þau verk sem eru falin yfirvöldum sem koma að skoðunum, fyrirkomulag við samvinnu milli yfirvalda sem koma að skoðunum í aðildarríki, í öðrum aðildarríkjum og, eins og við á, milli yfirvalda í aðildarríkjunum og þriðju löndum, ásamt upplýsingum um þjálfun skoðunarmanna og upplýsingum um mannafla, fjármagn og önnur tilföng vegna framkvæmdar viðkomandi skoðunaráætlunar.
- 3) Skoðunaráætlanir geta verið aðgreindar eða sem sérskilgreindur hluti af öðrum áætlunum.
- 4) Þar eð skoðunaráætlanir falla undir tilskipun Evrópuþingsins og ráðsins 2003/4/EB <sup>(5)</sup> gilda ákvæði þeirrar tilskipunar, þ.m.t., þar sem við á, undantekningarnar í 4. gr., um slíkar áætlanir.

(\*) Þessi ESB-gerð birtist í Stjtið. ESB L 189, 27.6.2014, bls. 135. Hennar var getið í ákvörðun sameiginlegu EES-nefndarinnar nr. 230/2015 frá 25. september 2015 um breytingu á XX. viðauka (Umhverfismál) við EES-samninginn, biður birtingar.

<sup>(1)</sup> Hefur enn ekki verið birt í Stjórnartíðindunum.

<sup>(2)</sup> Hefur enn ekki verið birt í Stjórnartíðindunum.

<sup>(3)</sup> Afstaða Evrópuþingsins frá 17. apríl 2014 (hefur enn ekki verið birt í Stjórnartíðindunum) og ákvörðun ráðsins frá 6. maí 2014.

<sup>(4)</sup> Tilskipun Evrópuþingsins og ráðsins (EB) nr. 1013/2006 frá 14. júní 2006 um tilflutning úrgangs (Stjtið. ESB L 190, 12.7.2006, bls. 1).

<sup>(5)</sup> Tilskipun Evrópuþingsins og ráðsins 2003/4/EB frá 28. janúar 2003 um almennan aðgang að upplýsingum um umhverfismál og niðurfellingu á tilskipun ráðsins 90/313/EBE (Stjtið. ESB L 41, 14.2.2003, bls. 26).

- 5) Niðurstöður skoðana og þær ráðstafanir sem gerðar eru, þ.m.t. hvaða viðurlögum er beitt, ættu að vera aðgengilegar almenningi, þ.m.t. með rafrænum hætti á Netinu.
- 6) Mismunandi reglur gilda um allt Sambandið að því er varðar valdheimildir og möguleika yfirvalda, sem koma að skoðunum í aðildarríkjum, til þess að krefjast sönnunargagna til að staðfesta lögmæti tilflutninga. Slík sönnunargögn geta m.a. varðað hvort efni eða hlutur sé úrgangur í skilningi reglugerðar (EB) nr. 1013/2006, hvort úrgangurinn sé rétt flokkaður og hvort úrgangurinn verði sendur á umhverfissvænar starfsstöðvar í samræmi við 49. gr. þeirrar reglugerðar. Ákvæði 50. gr. reglugerðar (EB) nr. 1013/2006 ættu því að veita yfirvöldum sem koma að skoðunum í aðildarríkjum möguleikann á að krefjast slíkra sönnunargagna. Slíkra sönnunargagna má krefjast á grundvelli almennra ákvæða eða í hverju tilviki fyrir sig. Séu slík sönnunargögn ekki lögð fram eða þau teljast ófullnægjandi ætti flutningur efnisins eða hlutarins sem um ræðir, eða tilflutningur úrgangsins sem um ræðir, að teljast ólöglegur tilflutningur og ætti að meðhöndla hann í samræmi við viðeigandi ákvæði reglugerðar (EB) nr. 1013/2006.
- 7) Ólöglegan tilflutning úrgangs má oft rekja til söfnunar, flokkunar og geymslu án eftirlits. Kerfisbundnar skoðanir í tengslum við tilflutning úrgangs ættu því að hjálpa við að auðkenna og að takast á við þessa eftirlitslausu starfsemi og þar með stuðla að framkvæmd reglugerðar (EB) nr. 1013/2006.
- 8) Í því skyni að aðildarríkjum gefist nægur tími til að undirbúa beitingu ráðstafananna sem krafist er í 50. gr. reglugerðar (EB) nr. 1013/2006, eins og henni er breytt með þessari reglugerð, þykir rétt að fyrstu skoðunaráætlanirnar verði samþykktar fyrir 1. janúar 2017.
- 9) Vegna gildistöku Lissabonsáttmálans ætti að samræma valdheimildina, sem framkvæmdastjórninni er veitt samkvæmt reglugerð (EB) nr. 1013/2006, við 290. og 291. gr. áttmálans um starfshætti Evrópusambandsins (SUSE).
- 10) Að því er varðar breytingar á tilteknum veigalitlum þáttum reglugerðar (EB) nr. 1013/2006 ætti að fela framkvæmdastjórninni vald til að samþykkja gerðir í samræmi við 290. gr. áttmálans um starfshætti Evrópusambandsins. Einkum er mikilvægt að framkvæmdastjórnin hafi viðeigandi samráð meðan á undirbúningsvinnu hennar stendur, þ.m.t. við sérfræðinga. Við undirbúning og samningu framseldra gerða ætti framkvæmdastjórnin að tryggja samhlíða, tímanlega og viðeigandi afhendingu viðkomandi skjala til Evrópuþingsins og ráðsins.
- 11) Til að tryggja samræmd skilyrði fyrir framkvæmd reglugerðar (EB) nr. 1013/2006 ætti að fela framkvæmdastjórninni framkvæmdarvaldið. Þessu valdi ætti að beita í samræmi við reglugerð Evrópuþingsins og ráðsins (ESB) nr. 182/2011 <sup>(6)</sup>.
- 12) Því ætti að breyta reglugerð (EB) nr. 1013/2006 til samræmis við það.

#### SAMÞYKKT REGLUGERÐ ÞESSA:

##### *1. gr.*

Reglugerð (EB) nr. 1013/2006 er breytt sem hér segir:

- 1) Eftirfarandi liðir bætast við 2. gr.:

„7a. „endurnotkun“: eins og hún er skilgreind í 13. mgr. 3. gr. tilskipunar Evrópuþingsins og ráðsins 2008/98/EB (\*).

<sup>(6)</sup> Reglugerð Evrópuþingsins og ráðsins (ESB) nr. 182/2011 frá 16. febrúar 2011 um reglur og almennar meginreglur varðandi tilhögun eftirlits aðildarríkjanna með framkvæmdastjórninni þegar hún beitir framkvæmdavaldi sínu (Stjtið. ESB L 55, 28.2.2011, bls. 13).

35a. „skoðun“: aðgerðir framkvæmdar af hálfu viðkomandi yfirvalda til að ganga úr skugga um hvort starfsstöð, fyrirtæki, miðlari, söluaðili, tilflutningur úrgangs eða tengd endurnýting eða förgun uppfylli viðeigandi kröfur sem settar eru fram í þessari reglugerð.“

---

(\*) Tilskipun Evrópuþingsins og ráðsins 2008/98/EB frá 19. nóvember 2008 um úrgang og um niðurfellingu tiltekinnna tilskipana (Stjtið. ESB L 312, 22.11.2008, bls. 3).

2) Í stað 4. mgr. 26. gr. komi eftirfarandi:

„4. Ef viðkomandi lögbær yfirvöld og tilkynnandinn koma sér saman um það er heimilt að leggja fram og skiptast á þeim upplýsingum og gögnum, sem um getur í 1. mgr., með rafrænum gagnaskiptum með rafrænni undirskrift eða rafrænni sannvottun í samræmi við tilskipun Evrópuþingsins og ráðsins 1999/93/EB (\*) eða með sambærilegu rafrænu sannvottunarkerfi sem veitir sama öryggi.“

Í því skyni að greiða fyrir framkvæmd fyrstu undirgreinar skal framkvæmdastjórnin, ef það er raunhæft, samþykkja framkvæmdargerðir um tækni- og skipulagskröfur fyrir verklega framkvæmd rafrænna gagnaskipta við framlagningu skjala og upplýsinga. Framkvæmdastjórnin skal taka tillit til viðkomandi alþjóðlegra staðla og tryggja að þessar kröfur séu í samræmi við tilskipun 1999/93/EB eða veita a.m.k. sama öryggisstig og kveðið er á um samkvæmt þeirri tilskipun. Samþykkja skal þessar framkvæmdargerðir í samræmi við rannsóknarmálsmeðferðina sem um getur í 2. mgr. 59. gr. a.“

---

(\*) Tilskipun Evrópuþingsins og ráðsins 1999/93/EB um ramma Bandalagsins frá 13. desember 1999 varðandi rafrænar undirskriftir (Stjtið. EB L 13, 19.1.2000, bls. 12).

3) Ákvæðum 50. gr. er breytt sem hér segir:

a) Í stað 2. mgr. komi eftirfarandi:

„2. Aðildarríkin skulu með ráðstöfunum til framfylgdar þessari reglugerð m.a. kveða á um skoðun starfsstöðva, fyrirtækja, miðlara og söluaðila í samræmi við 34. gr. tilskipunar 2008/98/EB og um skoðanir í tengslum við tilflutninga úrgangs eða tengda endurnýtingu eða förgun hans.“

b) Eftirfarandi málsgrein bætist við:

„2a. Að því er varðar allt landfræðilegt yfirráðasvæði þeirra skulu aðildarríkin sjá til þess, fyrir 1. janúar 2017, að komið sé á fót einni eða fleiri áætlunum, annaðhvort aðgreindum eða sem sérskilgreindum hluta af öðrum áætlunum, fyrir skoðanir sem fara fram skv. 2. mgr. („skoðunaráætlun“). Skoðunaráætlanir skulu byggjast á áhættumati, sem nær yfir sértæka strauma úrgangs og upptök ólöglegra tilflutninga og taka tillit til, séu þau fánleg og eiga við, gagna sem eru byggð á vitneskju úr rannsóknum lögreglu og töllyfirvalda ásamt greiningu á afbrotastarfsemi. Við áhættumatið skal m.a. miða að því að tilgreina lágmarksfjölda skoðana sem þörf er á, þ.m.t. eftirlit með ástandi starfsstöðva, fyrirtækja, miðlara, söluaðila og tilflutningi úrgangs eða tengdri endurnýtingu eða förgun. Skoðunaráætlun skal ná yfir eftirfarandi:

a) markmið og forgangsröðun skoðananna, þ.m.t. lýsing á því hvernig forgangsröðunin var ákvörðuð,

b) hvaða landfræðilegt svæði tiltekin skoðunaráætlun nær yfir,

c) upplýsingar um fyrirhugaðar skoðanir, þ.m.t. eftirlit með ástandi,

- d) verkefni sem hverju yfirvaldi sem kemur að skoðun er úthlutað,
- e) fyrirkomulag á samvinnu milli yfirvalda sem koma að skoðunum,
- f) upplýsingar um þjálfun skoðunarmanna um atriði sem snúa að skoðunum og
- g) upplýsingar um mannafla, fjármagn og önnur tilföng fyrir framkvæmd skoðunaráætlunarinnar.

Skoðunaráætlun skal endurskoðuð a.m.k. á þriggja ára fresti og uppfærð eftir því sem við á. Við endurskoðunina skal meta að hve miklu marki markmið og aðrir þættir skoðunaráætlunarinnar hafa náðst.“

- c) Í stað 3. mgr. komi eftirfarandi:

„3. Skoðanir í tengslum við tilflutninga geta einkum farið fram:

- a) á upphafsstað í samvinnu við framleiðanda, úrgangshafa eða tilkynnanda,
- b) á ákvörðunarstað, þ.m.t. bráðabirgðaendurnýtingar og endurnýting sem er ekki til bráðabirgða eða förgun, í samvinnu við viðtakanda eða stöð,
- c) á landamærum Sambandsins og/eða
- d) meðan á tilflutningi stendur innan Sambandsins.“

- d) Í stað 4. mgr. komi eftirfarandi:

„4. Skoðun í tengslum við tilflutninga skal fela í sér sannprófun á skjölum, staðfestingu á auðkenni og, ef við á, eftirlit með ástandi úrgangsins.“

- e) Eftirfarandi málsgreinar bætist við:

„4a. Til að ganga úr skugga um að efni eða hlutur, sem er fluttur á vegum, með járnbrautum, flugi, á sjó eða skipgengum vatnaleiðum, sé ekki úrgangur geta yfirvöld sem koma að skoðunum, með fyrirvara um tilskipun Evrópuþingsins og ráðsins 2012/19/ESB (\*), farið fram á að sá einstaklingur eða lögaðili sem hefur efnið eða hlutinn sem um er að ræða í sinni vörslu, eða sá sem annast flutninginn, leggi fram skrifleg sönnunargögn:

- a) um uppruna og ákvörðunarstað efnisins eða hlutarins sem um er að ræða og
- b) um að ekki sé um úrgang að ræða, þ.m.t., eftir því sem við á, staðfestingu á virkni.

Að því er varðar fyrstu undirgreinina skal einnig ganga úr skugga um viðeigandi varnir efnisins eða hlutarins gegn skemmdum við flutning, fermingu og affermingu, s.s. með fullnægjandi umbúðum og viðeigandi stöflun.

4b. Yfirvöld sem koma að skoðunum geta ákvarðað að efnið eða hluturinn sem um er að ræða sé úrgangur í tilvikum þar sem:

- sönnunargögnin, sem um getur í 4. mgr. a eða sem krafist er samkvæmt annarri löggjöf Sambandsins, til að ganga úr skugga um að efni eða hlutur sé ekki úrgangur, hafa ekki verið lögð fram innan þess tímabils sem þau tilgreina eða
- þau telja tiltæk sönnunargögn og upplýsingar ófullnægjandi til að komast að niðurstöðu eða þau telja varnir gegn skemmdum, sem um getur í annarri undirgrein 4. mgr. a, ófullnægjandi.

Í slíkum tilvikum skal flutningur á efninu eða hlutnum sem um er að ræða eða tilflutningur úrgangsins sem um er að ræða teljast ólöglegur. Af þessum sökum skal fara með hann í samræmi við 24. og 25. gr. og yfirvöldin sem koma að skoðunum skulu tafarlaust tilkynna lögbæru yfirvaldi þess lands, þar sem skoðunin fór fram, um það.

4c. Í því skyni að komast að því hvort tilflutningur úrgangs uppfylli ákvæði þessarar reglugerðar geta yfirvöldin sem koma að skoðunum krafist þess að tilkynnandinn, sá sem skipuleggur tilflutninginn, eigandinn, flutningsaðilinn, viðtakandinn og stöðin sem tekur við úrganginum leggi fyrir yfirvöldin viðeigandi skrifleg sönnunargögn innan tímabils sem þau tilgreina.

Í því skyni að komast að því hvort tilflutningur úrgangs, sem fellur undir almennu upplýsingakröfurnar í 18. gr., sé ætlaður til endurnýtingar í samræmi við 49. gr. geta yfirvöldin sem koma að skoðunum krafist þess að sá sem skipuleggur tilflutninginn leggi fram viðeigandi skrifleg sönnunargögn, sem eru lögð fram af starfsstöð sem annast bráðabirgðaendurnýtingu og endurnýtingu sem ekki er til bráðabirgða, samþykkt af lögbæru yfirvaldi ákvörðunarstaðar.

4d. Ef sönnunargögnin, sem um getur í 4. mgr. c, hafa ekki verið lögð fram til yfirvalda, sem koma að skoðunum, innan þess tímabils sem þau tilgreina eða þau telja að tiltæk sönnunargögn og upplýsingar nægi ekki til að komast að niðurstöðu skal viðkomandi tilflutningur teljast ólöglegur. Af þessum sökum skal fara með hann í samræmi við 24. og 25. gr. og yfirvöldin sem koma að skoðunum skulu tafarlaust tilkynna lögbæru yfirvaldi þess lands, þar sem skoðunin fór fram, um það.

4e. Fyrir 18. júlí 2015 skal framkvæmdastjórnin samþykkja með framkvæmdargerðum bráðabirgðasamsvörunartöflu yfir annars vegar kóða sameinuðu nafnaskrárinnar sem kveðið er á um í reglugerð ráðsins (EBE) nr. 2658/87 (\*\*\*) og hins vegar yfir færslur um úrgang sem tilgreindar eru í III. viðauka, III. viðauka A, III. viðauka B, IV. viðauka, IV. viðauka A og V. viðauka við þessa reglugerð. Framkvæmdastjórnin skal sjá til þess að samsvörunartaflan sé uppfærð til þess að endurspegla breytingar á nafnaskránni og færslunum sem tilgreindar eru í þessum viðaukum og einnig að hún feli í sér alla nýja kóða sem tengjast úrgangi í samræmdu tollskránni sem Alþjóðatollstofnunin getur samþykkt.

Samþykkja skal þessar framkvæmdargerðir í samræmi við rannsóknarmálsmeðferðina sem um getur í 2. mgr. 59. gr. a.“

(\*) Tilskipun Evrópuþingsins og ráðsins 2012/19/ESB frá 4. júlí 2012 um raf- og rafeindabúnaðarúrgang (Stjtið. ESB L 197, 24.7.2012, bls. 38).  
(\*\*) Reglugerð ráðsins (EBE) nr. 2658/87 frá 23. júlí 1987 um tollskrár- og hagtöluflokkunarkerfið og sameiginlegu tollskrána (Stjtið. EB L 256, 7.9.1987, bls. 1).

f) Í stað 5. mgr. komi eftirfarandi:

„5. Aðildarríkin skulu vinna saman, tvö eða fleiri, til að auðveldara sé að koma í veg fyrir eða koma upp um ólöglega tilflutninga. Þau skulu skiptast á viðeigandi upplýsingum um tilflutning úrgangs, úrgangsfleði, rekstraraðila og starfsstöðvar og deila reynslu og kunnáttu varðandi framfylgdarráðstafanir, þ.m.t. áhættumatið sem framkvæmt er skv. 2. mgr. a í þessari grein, innan ramma þess skipulags sem komið hefur verið á, einkum gegnum net fulltrúa samkvæmt tilnefningum í samræmi við 54. gr.“

## 4) Í stað 2. mgr. 51. gr. komi eftirfarandi:

„2. Fyrir lok hvers almanaksárs skulu aðildarríkin einnig semja skýrslu fyrir næstliðið ár, sem byggist á viðbótarspurningalistanum í IX. viðauka, og senda hana til framkvæmdastjórnarinnar. Innan mánaðar eftir að skýrslan er lögð fyrir framkvæmdastjórnina skulu aðildarríki einnig gera hluta skýrslunnar sem varðar 24. gr. og 1. mgr., 2. mgr. og 2. mgr. a í 50. gr., þ.m.t. töflu 5 í IX. viðauka, aðgengilegan öllum, þ.m.t. með rafrænum hætti á Netinu, ásamt öllum útskýringum sem aðildarríkin telja viðeigandi. Framkvæmdastjórnin skal taka saman skrá yfir tengla aðildarríkjanna sem um getur í hlutanum sem varðar 2. mgr. og 2. mgr. a í 50. gr í IX. viðauka og veita almenningi aðgang að henni á vefsíðu sinni.“

## 5) Í stað 58. gr. komi eftirfarandi:

„58. gr.

**Breytingar á viðaukum**

1. Framkvæmdastjórnin skal hafa umboð til að samþykkja framseldar gerðir, í samræmi við 58. gr. a, í því skyni að breyta eftirfarandi:

- a) ákvæðum I. viðauka A, I. viðauka B, I. viðauka C, II. og III. viðauka, III. viðauka A, III. viðauka B, og IV., V., VI. og VII. viðauka til að taka tillit til þeirra breytinga sem samþykktar eru samkvæmt Basel-samningnum og ákvörðun Efnahags- og framfarastofnunarinnar,
- b) ákvæðum V. viðauka til að hann endurspegli samþykktar breytingar á skránni yfir úrgang sem var samþykkt í samræmi við 7. gr. tilskipunar 2008/98/EB,
- c) ákvæðum VIII. viðauka þannig að hann endurspegli ákvarðanir sem teknar eru samkvæmt viðeigandi alþjóðasamþykktum og -samningum.“

## 6) Eftirfarandi grein bætist við:

„58. gr. a

**Beiting framsals**

1. Framkvæmdastjórninni er falið vald til að samþykkja framseldar gerðir með fyrirvara um skilyrðin sem mælt er fyrir um í þessari grein.

2. Það framsal valds, sem um getur í 58. gr., skal falið framkvæmdastjórninni í fimm ár, frá og með 17. júlí 2014. Framkvæmdastjórnin skal taka saman skýrslu um framsal valds, eigi síðar en níu mánuðum fyrir lok fimm ára tímabilsins. Framsal valds skal framlengt með þegjandi samkomulagi um jafnlangan tíma nema Evrópuþingið eða ráðið andmæli þeirri framlengingu eigi síðar en þremur mánuðum fyrir lok hvers tímabils.

3. Evrópuþingið eða ráðið getur hvenær sem er afturkallað framsal valds sem um getur í 58. gr. Með ákvörðun um afturköllun skal bundinn endi á framsal valdsins sem tilgreint er í þeirri ákvörðun. Ákvörðunin öðlast gildi daginn eftir birtingu hennar í *Stjórnartíðindum Evrópusambandsins* eða síðar, eftir því sem tilgreint er í ákvörðuninni. Hún skal ekki hafa áhrif á gildi framseldra gerða sem þegar eru í gildi.

4. Um leið og framkvæmdastjórnin samþykkir framselda gerð skal hún samtímis tilkynna það Evrópuþinginu og ráðinu.

5. Framseld gerð, sem er samþykkt skv. 58. gr., skal því aðeins öðlast gildi að Evrópuþingið eða ráðið hafi ekki haft uppi nein andmæli innan tveggja mánaða frá tilkynningu um gerðina til Evrópuþingsins og ráðsins eða ef bæði Evrópuþingið og ráðið hafa upplýst framkvæmdastjórnina, áður en fresturinn er liðinn, um þá fyrirætlan sína að hreyfa ekki andmælum. Þessi frestur skal framlengdur um tvo mánuði að frumkvæði Evrópuþingsins eða ráðsins.“

- 7) Ákvæði 59. gr. falli brott.
- 8) Í stað 59. gr. a komi eftirfarandi:

„59. gr. a

#### **Nefndarmeðferð**

1. Framkvæmdastjórnin skal njóta aðstoðar nefndarinnar sem komið er á fót með 39. gr. tilskipunar 2008/98/EB. Nefnd þessi er nefnd í skilningi reglugerðar (ESB) nr. 182/2011.

2. Þegar vísað er til þessarar málsgreinar gildir 5. gr. reglugerðar (ESB) nr. 182/2011.

Skili nefndin ekki álitni skal framkvæmdastjórnin ekki samþykkja drögin að framkvæmdargerðinni og ákvæði þriðju undirgreinar 4. mgr. 5. gr. reglugerðar (ESB) nr. 182/2011 gilda.“

- 9) Í 60. gr. bætist við eftirfarandi málsgrein:

„2a. Eigi síðar en 31. desember 2020 skal framkvæmdastjórnin annast endurskoðun á þessari reglugerð, m.a. með tilliti til skýrslna sem gerðar eru í samræmi við 51. gr., og leggja skýrslu um niðurstöðurnar fyrir Evrópuþingið og ráðið ásamt tillögum að nýrri löggjöf ef við á. Í þeirri endurskoðun skal framkvæmdastjórnin einkum íhuga skilvirkni ákvæða 2. mgr. a í 50. gr. við að berjast gegn ólöglegum tilflutningi með tilliti til umhverfislegra, félagslegra og efnahagslegra þátta.“

- 10) Ákvæðum IX. viðauka er breytt sem hér segir:

- a) Í stað þáttarins sem varðar 2. mgr. 50. gr. komi eftirfarandi:

„Samantekt upplýsinga um niðurstöður skoðana sem fara fram skv. 2. mgr. 50. gr. þ.m.t.:

— fjöldi skoðana, þ.m.t. eftirlit með ástandi starfsstöðva, fyrirtækja, miðlara og söluaðila tengdum tilflutningi úrgangs:

— fjöldi skoðana í tengslum við tilflutning úrgangs, þ.m.t. eftirlit með ástandi:

— fjöldi meintra lagabrota er varða starfsstöðvar, fyrirtæki, miðlara og söluaðila tengdum tilflutningi úrgangs:

— fjöldi meintra, ólöglegra tilflutninga sem staðfestir hafa verið við skoðanirnar:

Aðrar athugasemdir:“

- b) Eftirfarandi þáttur sem varðar 2. mgr. a í 50. gr. bætist við:

„2. mgr. a 50. gr.

#### **Upplýsingar um skoðunaráætlun eða -áætlanir**

Fjöldi skoðunaráætlana fyrir allt landfræðilegt yfirráðsvæðið:

Dagsetning samþykktar skoðunaráætlunar eða áætlana og gildistími þeirra:

Síðasti endurskoðunardagur skoðunaráætlunarinnar eða -áætlanna:

Yfirvöld sem koma að skoðunum og samvinna á milli þessara yfirvalda:

Tilgreinið einstaklinga eða stofnanir sem má tilkynna áhyggjur eða frávik til:“.

c) Eftirfarandi þáttur sem varðar 2. mgr. og 2. mgr. a í 50. gr. bætist við:

„Tengillinn þar sem hægt er að nálgast upplýsingar, sem aðildarríkin gerðu aðgengilegar öllum á Netinu í samræmi við 2. mgr. 51. gr., með rafrænum hætti.“

11) Í stað fyrirsagnar síðasta dálks í töflu 5 í IX. viðauka komi eftirfarandi:

„Ráðstafanir, sem gerðar eru, einnig hugsanleg viðurlög.“

2. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Hún kemur til framkvæmda frá og með 1. janúar 2016.

Þrátt fyrir ákvæði annarrar málsgreinar gildir 4. liður 1. gr. frá og með 1. janúar 2018.

Reglugerð þessi er bindandi í heild sinni og gildir í öllum aðildarríkjum án frekari lögfestingar.

Gjört í Brussel 15. maí 2014.

*Fyrir hönd Evrópuþingsins,*

M. SCHULZ

*forseti.*

*Fyrir hönd ráðsins,*

D. KOURKOULAS

*forseti.*

---